

蕭

陽

文

獻

陳俊傳第六十

陳俊字時英號愚庵父珪舉鄉貢為文昌教諭俊少負才厲志中正統丁卯鄉試第一戊辰登進士第授戶部主事父珪卒解官迎喪海南富土物一無所取服闋仍除舊職景泰甲戌差督天津等衛舊欠秋青草束俊上言採取舊有額已難徵辦況歲增耶漁不可以竭澤朝議是之得減增數三十五萬束蘇松諸部負上供銀七十餘萬兩復受委往徵不數月告完部長貳奇其才俾典閩部章奏轉郎中兩廣用兵遣俊督饋餉假以便宜處分時廣中鹽利甚夥鹽商往

性越界以規利俊令凡越界鹽每引輸米二斗以餉
兵公私俱便丁毋憂乞守制不允師還始奔喪總兵
監軍合百金為賻却之成化紀元復任郎中於其部
未幾陞南京太常寺少卿時郎官久無拜卿少者俊
以賢譽得之戊子召為戶部右侍郎俊於戶部號素
練至是邊事動四方奏災傷文移選案諮議旁午尚
書楊鼎以剛訐自任俊佐之凡所裁處悉合事宜部
屬相謂諸稿有陳公筆如錠金然其重之如此京師
饑奉詔平糶太倉粟百萬斛以利民俊慮權貴乘時
射利乃請石以下許糶多者禁不與壬辰命總督邊

餉于陝西時邊庾空竭歲且不登芻粟價湧而榆林
延綏糧道險遠輸者病之俊乃請出內帑銀助邊且
修西安韓城同官徑道以便飛輓軍興無乏諸將成
功凱還俊加食從二品俸改吏部轉左滿九載拜南
京戶部尚書改兵部參贊機務轉吏部丙午又滿九
載赴闕請老 憲廟不允賜羊酒寶鈔俾還任與子
天敘入冑監俊復乞休遂加太子少保致仕逾年改
元弘治以疾卒年七十訃聞遣官諭祭營葬賜謚康
懿俊為人沉毅簡重孝友畏慎蓋終身之行也故哀
榮特異云

出彭志

姪孫應之正德丁丑進士任南京戶部

員外郎

陳俊傳第六十

彭韶傳第六十一

彭韶字鳳儀自號從吾父思孝為鄉耆儒累贈都察院右副都御史韶幼注重警敏少長趣向已端景泰七年領鄉薦明年改元天順會試第七人拜刑部山西司主事署員外郎時有張岐者自外臺擢都察院右僉都御史協管院事韶以其人非才疏論其不可且願收召王竑李秉葉盛以伸公論忤旨下錦衣獄都給事中毛弘等上言韶持論雖過心實懷忠得宥復職尋進廣東司郎中是司素稱繁劇所按事多涉貴近韶屹然持正不少屈外戚周遵者與畿內民爭

田詔擇公正法司官往勘衆推韶韶至田所環視周
匝徑歸上自劾之奏曰田本民有雖其籍報未盈管
業之數然地有高下歲有旱潦細民頻年出賦以給
公上旱則資汙下以補高仰潦則資高仰以裨汙下
豈可以民田給貴戚重傷國本復下錦衣獄科道交
章言其無他得釋俄而復有請荒田者 上顧左右
曰彼不見周遵之事奈何又請耶六年陞四川按察
副使開縣有劉姓者戶先析為二一徙一留後徙者
復業與留者爭里役不得遂陰嗾安岳扈氏兄弟焚
滅其家凡二十一人有司以事無證佐尼不行始行

部至邑聞之大駭捕得扈氏并其徒十餘人一訊款服寘於法定遠縣民一日忽聞盜至空邑而逸有曾姓者弟乘機入兄室掠其貲兄迹知之訴於官弟夜聚群不逞盡殺其家十有二人乃偽為不知持狀訴於韶鞠之得兇黨七人斃於獄十一年陞本司按察使疏乞各王府祭壘省差內官及行人等官以免勞費從之十四年陞廣東左布政使時農民補吏率視其房分高下令納銀有差名曰公堂韶嘆曰取其財而責以不貪可乎乃選俊秀善書者克之積弊遂革鎮守內臣顧恒歲有貢獻韶疏言自古明王不寶遠

物廣東民力竭矣守土之臣以此事上為恭不知凋
傷國本遺害及大也監船內臣韋眷請以均役餘剩
六十戶隸船司以辦貢獻韶疏言今之官民富強不
及於昔者蓋因害財之多故也使及今加意撙節猶
恐無以為況又益以雜用其何以善後哉眷所奏餘
戶乞暫與一年以後停罷有詔減其半廣人陳獻章
以學行有聲于時韶抗疏薦之凡廣南一時名士皆
加敬禮以激勵後進太監梁方有弟為錦衣衛千戶
在鄉國私採禽鳥諸物進貢官民俱罹其害韶復上
書言狀忤旨調貴州布政使啓行之日廣父老泣送

河下如去慈父母至有追送數百里外者蓋貴藩僅
九閱月因俗為政貴人安之擢都察院右副都御史
巡撫蘇松嘉湖等處惟鎮以簡靜而吏自不敢犯科
召為大理卿未上坐論鎮守內外等官貢獻非宜道
致左副都御史巡撫順天等處兼整飭薊北軍務陳
特政以弭天變議糧運以便軍民累有所建白

孝宗登極臣僚交薦召為刑部右侍郎屬浙西不靖
勅韶巡視至則誅其渠魁數人而劾罷守臣一方晏
然既而戶部言兩浙鹽法久壞因命韶以本官兼左
僉都御史留治之韶蚤夜講究利病陳便宜數條取

旨行之又憫煮海之氓貧苦以其山場草蕩晒淋煎熬折閱征陪之狀略分八節具圖以進還朝轉吏部左侍郎弘治三年彗見天津詔群臣言軍民利病時政得失韶言軍民利病有二曰厚根本曰減役錢時政得失亦有二曰正近侍曰慎官爵時左右侵權者衆詔於正近侍條有曰內臣出入左右言語輕重能為禍福人所畏憚今兵馬錢糧人匠柴炭盡付其手分例相沿更相倣倣虛名實支遮揜外觀誰能詰之比見凡有章奏無不先允而後下於該部該部奉行不復審處是失政體也及至有犯多從寬免有殺人

至死者竟不提問或有提問成獄旋復宥之是失刑
威也耗財妄費不惟不禁而反助之死者或有給還
葬銀八千兩在者或有許其蓋祠覓地第宅踰制服
食求奇於斯極矣聲勢移人望風震懾伏望陛下靜
思及此大公至正以服其心克勤克明以折其氣上
法祖宗乾剛獨斷褒良善而親忠良遠佞媚而斥奢
縱事務歸於所司威福必由已出則萬世永圖也終
篇又言臣獲隨午朝竊念日奏尋常起數於事無補
臣願自今午朝惟議經邦急務如吏部有大陞除禮
部有大災異戶部兵部有緊急錢糧邊報工部法司

有緊關工程囚犯之類許令先期開具事由奏乞聖
駕定日出御左順門侍衛一如午朝之儀事該各衙
門會議者各官就於御前公同計議如吏部陞除大
臣明言某官才德堪任某官資望未可之類內閣輔
臣亦同議可否事體既定就行口奏取旨奉行次日
補本備照若係本衙門自行者亦就御前逐日陳說
有無故事兩疑情由請旨定奪若事體重大一時難
決者聽各官先行博議於下候至朝時再議奏行仍
乞溫顏俯詢曲折如此不惟世事日熟聖明耳目而
群臣高下邪正亦自可見則凡時政得失軍民利病

自可次第張弛矣上嘉納之五年陞刑部尚書安遠
侯柳景總戎兩廣都御史秦紘發其贓鉅萬詔抵景
于法奏褫其爵景挾戚畹于內降欲破公議以擠紘
韶執奏不易後景賊追及八百兩有旨免其餘欠韶
復言景應追贓數十未及一乃盡行蠲宥此匪直祖
宗時未有雖前代亦未之見唐宣宗時元舅鄭光官
租不入京兆尹韋澳械其莊吏將寘于法宣宗欲寬
之澳謂如此是法獨行於貧戶宜候徵足乃釋之彼
唐宣宗時尚能如此豈以聖明顧反不及耶況景既
無元舅之親贓銀又非官租之比監追未久遂得寬

釋是臣等守法有愧於澳也左右有不樂詔所為者
摘其官屬細過以怵詔詔坦然由之終不為疑沮會
亢旱求言詔復因事納忠條陳四事以本部為荆庶
人事會本覆奏已踰半月未奉勅旨及他奏請問有
旬日方得旨者內使內官王萌苗通高求犯該該罪
俱各稱寃貸死發克淨軍臣聞自古帝王一過必
刑者所以彰天討之公若殺人不死復何所畏憚伏
望勤政守法事至物來隨即予奪宮中外庭視為一
體推廣他類無不皆然何患時政之不善哉道路傳
言今脩皇親昌國公張巒墳塋比諸往年勳戚之家

相去懸絕凡百制度務為宏壯計巒在地下豈能自
安順天府所屬州縣丁多殷實之家往往投充陵廟
墳戶及勇士校尉等役以避民差致將見戶重疊加
役富者累窮貧者逃竄村里蕭條人無生意伏望畏
天恤民將冒國公墳塋減去工程依式脩造俾得早
完仍勅該部將等役優免事例酌量定奪以便
遵守惟此及等之及遠何患軍民之不安哉皆時
所難言者以疾在告方起視事而二子三孫相繼夭
亡坐是憂鬱疾日浸加遂上疏乞休上勉留再三疏
復連三上始得俞旨命乘傳以歸家居歲餘卒年六

十六計聞贈太子少保謚惠安仍遣官諭祭營葬韶
蒞官忠誠懇至在外臺則務平寃滯剔奸蠹敦風俗
恤民隱在內臺則謹於守法不為利疚不為勢回而
亦常有法外之意其事親至孝友于二弟甚篤教養
其子同己子至於處已待人一於誠敬暮年名德益
尊而其自處退然如無所有是以上則九重知之愈
深下則賢士大夫望之愈重以至行旅走卒亦皆知
名云所著有名臣錄贊等書行於世子濟舉鄉貢

卒

楊吳黃方傳第六十二

楊琅字朝重黃石人天順三年鄉試第一八年登進士
第拜監察御史初 憲廟登極詔各處鎮守內臣俱
停罷不復設一時民情大悅成化元年傳言有內侍貢
獻希復差鎮守者琅即上章反覆言內臣不可以預
政倖門不可以輕啓疏留中不出然鎮守亦不復差
兵部尚書馬昂隨時浮沉翰林學士倪謙以罪去官
經營復入琅累與同官陳選等言之前兵部尚書王
竑素負重望齟齬於時因引疾家居琅上言宜起用
之以獎恬退給事中王徽等以直言斥邊方修撰羅

倫以正論補外職琅亦上疏乞留之俱不報其他所
論列尤多時號敢言御史二年差清軍江西四年復
差巡按浙江皆寬簡行事不吹毛索瘢以沽名六年
擢山東按察司僉事未幾改提調學校斟酌教條寬
嚴適中而一以至公行之士心悅服適歲歉癘疫大
作巡撫大臣遣藩臬佐貳分道賑恤時以地廣民飢
恐緩不及事因并遣琅以行盡心竭力無少顧避行
至東阿染疫自起更衣冠端坐卒於舟中諸生哀感
厚賻其喪以歸年四十六琅居家以孝友稱居鄉以
長厚稱居官以端介稱人無間言尤篤學善文攻書

法所著舉業經義世傳錄以為程式云從弟鐸弘治
庚戌進士官至知府從子清渤皆鄉貢士清訓導渤
知州雜誌

吳智字宏哲景泰二年進士授南京戶部主事丁
外艱改工部以學行簡陞四川僉事提督學校端楷
範嚴考校公去取其鄉宦有居政地者人爭附之智
一無所私士論帖然陞湖廣副使仍董學事其教法
不異在蜀時以老乞致仕歸囊橐蕭然蜀門人有為
御史按蒲者時智已病御史即卧內拜之屢叩以所
欲言智卒無所干乃嘆息而去沒後家計益落其清

標有足尚云

出府志

黃璉字汝器別號求我第成化二年進士授南京戶科給事中丁外艱服闋改南京禮科滿九載陞浙江布政司右叅議巡視溫處銀場弘治五年上慮各處銀場礦脉或微或絕歲課未免取盈於民乃詔所司體究裁豁凡官為是設者俱調別用璉於是改雲南其屬衛糧儲多衛僚攬之輸不以時巡撫大臣乃以屬漕因嚴設禁限祭驚者寘之於法自是七八年逋負悉輸納轉貴州叅政璉以其地夷獠雜居鎮以簡靜撫按交章以標履端方政事脩舉薦之陞本司右

布政使尋轉左屬普安夷叛朝命大臣率兵征勦特
委璉總督糧儲璉處置有方饋餉賴以不乏賊平方
將論功而璉以疾卒于官璉天性淳實且有量在浙
時年勞當遷適巡按御史張文意不滿於璉敘考有
貶辭遂不果遷後璉在貴州文以他事謫本司照磨
璉略不介意且薦其才於當道識者多之所居里東
南諸村落土田歲常苦旱璉乃白諸郡邑發民鑿渠
由金墩抵巖沁數里引木蘭延壽餘水溉之遂變磽
瘠為膏腴鄉人德之居官三十餘年不以生產為念
自奉極儉約死之日家無餘貲遺孤奔官所扶柩歸

未免稱貸於人庶幾清白之遺云

志府

方守宇宜約年十八舉鄉薦成化己丑進士授戶部主事累遷郎中嘗兩奉勅督理薊永及延寧二處邊餉出納無絲毫汙例當擢京堂僅出雲南叅政其部長不能平以質太宰三原王公怒吞曰吾豈不知方邪顧雲南萬里外官邪賂章用若人以剗滌其弊耳時林見素俊亦為其地憲副二人相與修明要束以拊循其入土酋爭官奪印歲相讎殺撫以恩信卒以寧妥修堡立學遣夷兒就業其風一變以連歲出入瘡痍耳漸失聰轉湖廣右轄未幾以母喪歸貧不自

給常稱貸于里人親舊強起就道疾加重遂致仕御
史宗彛給以田不受既卒見素言於官助其塋事官
二品而一貧至是世所謂清白吏者非邪弟憲成化
庚戌進士終知縣子彥舉鄉薦今為溧水教諭補遺同
時有林漢者任江西饒州通判以清介自厲勢家有
占湖田者上司委勘漢據法奪還之民勢家銜之厲
以考察落其官憲使侯某抗言曰林漢去江西官無
可留者竟去朝論大譁饒民號泣追送之境上家居
清約以壽終補遺

楊吳黃方傳第六十二

林黃顧方周林傳第六十三

林岳字魯瞻藻之後洪武末舉鄉貢授蘇州訓導九載秩滿諸生願卒業詣闕乞留又九載陞程鄉教諭丁外艱改仁化移疾歸岳為人簡儉自得冬一裘夏一葛飯蔬一味遇良辰美景携朋四出悠然吟賞家無甌石之儲不計也弟子業成或以金帛為束修亦不受曰我職然耳每歲大比交聘文衡赴者以得人為賀詩文敏速信手而成妙書法凡名家屏障士夫卷軸不得岳書相誚以為俗其為人所重如此家宰魏文靖公驥與岳同職教同考文交遊三十年每多

其有益子祥鳳亦舉鄉貢為鄆城訓導重義善教正
統十年擢監察御史十四年扈從北狩死於土木之
難詔與一子入冑監岳弟講天台教諭康京衛經歷

山志

黃謙字益甫祖思永洪武初以明經薦授福安教諭
謙登永樂二年進士第授魯府伴讀朝夕勸講因事
納忠恐其好獵則有諫獵之書見其作字則誦筆諫
之言嘗曰使吾王無愧於東平河間則謙亦可以無
忝於董賈矣謙詩文平妥字書尤清懇可觀與林教
諭岳並以辭翰為士林所重云所著有頤學齋稿藏

千家出府

顧文字在中別號在軒長卿之姪孫幼穎敏日記四
五千言及長該貫經史時稱博學為文章簡朗秀整
有長卿機軸洪武中以儒士薦為興化訓導秩滿遷
教諭歷任將樂金華九江三邑典文衡于江西湖廣
皆名得士宣德初致仕正統間卒祭酒李時勉為作
小傳族子孟喬正統四年禮部會試中式引病告歸
善治經學遠近聞者皆造門受業七年方赴廷試志
在早退於登科錄官年多占十餘歲授刑部主事丁
內艱改戶部秩滿遷郎中求歸省改南京刑部致仕

方仕時雖處刑名錢穀不廢傳習經其指教多所成
就若吏部尚書尹公旻乃其家食日親炙者士大夫
咸仰其善教云出孟喬予叔龍亦領鄉薦入太學授
廣州府通判未兩考部使者疏其治才薦之陞肇慶
府同知掌德慶州事卒于官出府

方熙字孟明鯉之族叔宣德五年進士選翰林庶吉
士方會試時熙當為次卷主司以其語奇置第五示
與諸經魁齊熙才高志大群試翰林屢居優等然言
議英發人頗憚之出為潮州府通判因目疾致仕熙
既仕不得志益以文章為事晚歲尤加意於古詩賦

有東軒集志弟杰姪臨以順以嘉孫師禹臨子瑤皆

舉鄉貢杰澄邁教諭臨章丘教諭以嘉潛山知縣

周瑩字次玉號鶴洲少有文名正統十年進士拜南京工部主事陞撫州府知府不數載解官歸閑居幾三十年甫之詩學舊有師承正統間漸失其傳瑩力以興衰復古為任居官不廢吟咏音調清灑書法亦流麗有郡齋新稿行世講姪轍軫俱第進士轍戶部主事軫以詩經魁禮闈為人質訥無害不能與時偃仰嘗進疏為用事者所忌任戶部主事九年遷郎中陞山東運使進江西按察使致仕

林庭芳先世福清人父震徙居莆之橫塘庭芳永樂十六年進士知新會縣罷歸敦朴能詩尤善選體柯殿元潛早從之學姪祭天順元年進士終廣東僉事子敷成化二年進士終韶州知府祭子沂博學強記十七年進士終貴州叅議莆人父子登第者十數家庭芳一門居其二其他若翁世資子洪黃深子乾亨乾亨子如金譽子穆林輝子誠誠子近龍思承子茂達元甫子有子俊子達堪子應驄子紀子主敬爰子登高陳音子華周瑛子大謨彭甫子大治高昂子江馬思驄子明衡柯英子維熊維騏姚永子文炤稱為

衣冠盛事

遺

林黃顧方周林傳第六十三

曾黃林鄭陳傳第六十四

曾景修名生以字行在泮歲久屢試不利為學好深
沉之思持辨博之論以實踐為功不事浮靡嘗著大
學中庸詳說行於世未樂三年應貢入太學授玉山
教諭秩滿陞德安教授與諸生處情同家人篤意講
解終日不倦故出其門者才質高下各有所成就宣
德元年浙江鄉試聘考試官卒葬德安

出彭志

黃諤字聲叔兄鼐第正統元年進士為戶部主事諤
以明經薦授仙遊訓導惇義篤教有知縣王彝者嘗
以白金二百兩寄諤雖愛妾莫之知也彝病死諤呼

其子授之陞廣元教諭與僉事董應軫同入蜀董船覆呼近岸小舟莫肯前諛曰是欲得財耳乃自出囊中金以招之衆乃亂流而進董獲免廣元為蜀北鄙學政久廢諛以義倡其人士相與修學舍建文廟每日衣冠坐堂上授諸生以詩書背誦覆講如法諸生有貧無資則解衣推食以助之故廣元人樂從其教及諛致仕歸乃即學宮之旁立祠肖像以祀之出明

諛所著廣元姪綸舉鄉貢順德教授孫顥弘治庚戌進

士授戶部主事戚畹有請拓其賜第者費甚鉅顥疏止其役不報顥為人有志識篤於倫紀居官所至有

治績終廣東叅政綸之孫待顯正德丁丑進士官戶部郎中

林未齡初名齡以字行旣之裔天順二年以郡庠弟子貞選升國學授翁源教諭以興學作人爲己任嚴立課程貧者助粟病者給藥邑之令丞事有齟齬者得其一言而決滿九載翁源父老疏其學行陞任民牧守臣以萊德縣僚俱缺員檄未齡往攝縣事未是嶺南巨盜黃蕭養作亂列郡俱被荼毒萊德尤甚未齡至乃招徠散亡賑恤貧窶蠲貸征賦不報已復舊乃募義民築城垣徙廟學於城內暇則集生徒講學

以疾卒父老哭之慟為歸其襯於闕翁源生徒尤念

之二處俱建祠祀焉

志序

林智字若潛蘊之裔領正統

九年鄉貢授宜興訓導每

蚤作燃燭坐齋中課諸生至夜乃息歷九載以為常

遷銅梁教諭以憂去比起復適宜興教諭缺員前諸

王德其教者又相與薦智補之南畿提學御史陳選

薦智自代吏部格於例擬注縣令智力辭少業業公

盛高其行特以蘇州教授處之滿九載諸生群白巡

撫懇留再任而智請老歸矣智司教幾三十年作人

為多若太學士徐公溥王公鑿其尤顯者子季瓊弘

治己未進士授監察御史

出府志

鄭循初字子初領正統十二年鄉薦授餘杭訓導循初嚴條約以身先之雖祁寒暑雨必衣冠端坐為諸生講解竟日無怠容滿考英廟詔吏部選教職中學問老成動止可法者一人為駙馬周景府學錄吏部合試得循初以應詔人有以莊田獻景者重賂循初為通循初峻拒之且戒景毋輕聽其後果有貴近請是莊而獲譴者景由是益敬重之秩滿遷南京國子監博士尋陞魯府右長史啓陳六事內一事言蕭宮闈以清內治頗忤王意未幾以外艱歸王竟坐廷

事得罪乃深悔不用循初言及起復王特奏乞還循
初舊任而循初先已拜秦府右長史矣隨事匡正多
所裨益居五載以老懇求歸進階中順大夫致仕卒
年八十一循初孝友簡靜家居十六年讀書著文足
迹不輕至公門士論重之子嘉祐登鄉貢卒知縣出府
林大猷字子道仕敏之曾孫也舉鄉薦授新建教諭
勤於啓迪待諸生有恩遷國子監學錄闍洛晉魯之
士執經從游者無慮數百人齋舍至不能容大猷為
之編次俾輪番聽講又以一日通集在館諸生通集
謂之普講祭酒耿公裕待以賓禮進監丞盡易宿弊

新舊規而與諸生講學益勤弗替諸生有貧者授以
衣病者給以藥死者則躬詣哭殮之或屬其鄉人挾
其喪歸或捐俸為買地京師以塋久而力弗能給又
以疏告于好義君子俾出資助焉滿九載陞翰林檢
討仍掌監丞事以疾卒于官註府大獻上行端謹學
問該博而慕古好義若嘗愆然議論懇惻獎與後進
有前輩之風居大學久規範嚴而一歸於正卒之日
六館諸生咸哀悼之子夔有雋才第弘治庚戌進士
終戶部員外郎同時大學有林祥者字世祥始由鄉
薦為博羅教諭誠心教人視諸生如子諸生亦終身

佩服不忘滿九載為立生祠祀之遷饒州教授其教一如初滿考諸生立去思碑淮王為之製文刻之遷大學助教與館下士講解不倦會淮府缺長史王奏乞祥補之未幾王薨世子勿祥盡心匡輔以年勞陞四品服色告老歸所居闌闌斗室靜坐人莫見其面祥存心惇慎言動必以禮事叔如父待姻族有恩庶幾古君子也在大學與大猷及學正陳璉皆以學行推重璉字子佩舉鄉薦為威縣教諭改高陽以身先諸生每晨升堂授書作課午後講書夜讀盡二鼓乃休諸生始苦而終化之束修節儀多謝却奔父喪歸

率諸弟一從家禮服闋二邑人士爭欲得璉終其教
太宰王端肅公賢之特遷國子學正從學者戶屢常
滿名重六館璉立志高古於義利界域甚嚴今師儒
中求如璉輩蓋絕少云補遺

陳鉞字廷厥號古崖大卞之後會元中之從姪高祖
肅元與化教諭曾祖祥洪武初浙江試僉事左遷合
江主簿鉞以邑庠弟子員應天順八年歲貢入試大
廷中高第授麻城教諭師道嚴正作人為多每嘆近
時為郡縣者多拘於文法無前輩風韻乃勸縣大夫
做文路公在洛故事建耆英堂遇節假日延致縣中

諸老為會以敦薄俗又考求前輩德行文章政事可
為師法者二十有一人各為之傳使學者有所考據
取法滿考遷瑞州府教授其為教如麻城時未幾以
疾卒於官鉞於舉業外汎濫諸家書積蓄淳澗詩清
曠微婉序記銘誌諸作亦博雅其在學淹滯最久至
今莆人蹶于科者多以鉞自解云性行孤潔一言一
動不苟士林以是尤推重之有古崖詩選梓行于世

出府志

曾黃林鄭陳傳第六十四

鄭紀傳第六十五

鄭紀字廷綱號東園仙遊人叔之後天順庚辰進士
選庶吉士授翰林院檢討與同年洛陽劉建南昌張
元禎為莫逆交劉嘗稱之曰鄭廷綱有經濟之才未
幾以親老移疾歸做浦江鄭氏家範閭門聚會種樹
治生冠婚喪祭悉從文公家禮延孝子劉子賢雲同
講肄歲給穀數十斛以調其貧往時縣官科率無藝
紀為立定規裁省冗費率鄉人修復諸處橋梁家食
凡二十年再起供職遷浙江提學副使令諸生兼讀
五經白文行鄉射禮召入為國子祭酒教規甚嚴杜

絕干請監有膳餘銀不例取同僚以紀形其超銜之
紀以前輩自處遇科道官不能折節為禮因相與撻
撫其事論劾 孝廟謂紀到任未久未宜有此令條
析以聞改南京通政司左通政陞太常寺卿戶部右
侍郎適南畿災紀以漕米權宜水兌積出餘米二十
餘萬石賑濟又將月糧放支本色以平米價奏革京
儲冗食鹽鈔攬納之弊皆有惠利及人然竟以前被
論踵襲言之不已紀亦屢疏乞休特劉公健在內閣
重其才固留之最後進南京戶部尚書致仕邑舊無
城垣紀力請于官修築之人賴以安卒年七十六賜

祭葬如儀仙之人才宋時與莆埒入國朝科日常乏
官亦不顯獨紀歷清華至八座為其邑之冠詩文清
新敏贍有東園文集吟稿歸田錄奏疏若干卷子主
敬正德戊辰進士授戶部主事卒

補遺

鄭紀傳第六十五

黃巖朱方林傳第六十六

黃譽字廷求叔父宦南安教授譽少有志操剛果自立正統中科場文體散緩譽獨變為新奇簡淨一時翕然宗之甲子舉鄉試第一登戊辰進士授南京監察御史遷浙江僉事所至摧姦去暴號括地黃喻除草盡絕也材高氣烈人敬憚之擢浙江叅政改湖廣卒三子穆秀秩皆舉鄉貢從弟謹宦之子也景泰甲戌進士亦為南京監察御史陞湖廣僉事卒元謹子鐸成化乙未進士授刑部主事頗有志尚穆登丁未進士選翰林庶吉士授編脩為人侃侃有父風俱早

卒穆孫大經第正德辛巳進士授戶部主事

出府志

嚴淦字宗源先世戍籍于莆淦領鄉薦入太學時柯
殿元潜在太學擅名因相與剗剗造詣日益深一時
太學之士以詩書名者皆取正於二人而莆二經之
傳因益有聞登景泰五年進士第改翰林庶吉士同
脩寰宇志拜御史督學南畿嚴考校絕請託權門要
路謗憾雖多弗卹也陞浙江憲副仍理南畿學政以
不便行事改湖廣撫流民復提學秩滿陞廣東憲使
湖廣右方伯暨轉左命下而淦卒矣淦性狷毅蒞官
守法與人不苟合先輩曾景脩以書經倡莆教授德

安父子繼歿僅一孫隨母改適淫物色得之資其歸
以奉曾祀

志出府

朱寬字宏裕璣之後第天順元年進士拜南京禮科
給事中成化改元同官王徽與寬等五人陳言五事
內一事言保全內官貴近街之繼而太監牛玉有罪
黜居南京寬復與徽等上疏論玉有當死之罪四宜
梟首街市且謂內閣大臣阿徇不言亦有黨惡欺君
之罪未復申前疏保全內官之說一不許與聞國政
二不許與外官私相交結三不許弟姓在外任事并
置立產業反覆千餘言尤為切直用事者因媒孽之

欲寘之極地特貸左遷潼川州判官既至官興教勸
農舉利剔蠹被省檄進賀表京師取道歸省還任道

卒

出府志

方珪字純潔第成化五年進士拜御史嘗巡督蘇松
常鎮及兩浙鹽課特有錢學士之子鬻販私鹽巡撫
都御史檄蘇州府為之給民倍收其價事覺珪寘于
法因劾其父貪利蠹法都御史附勢剝民知府朋姦
不職自是元豪宿猾斂迹避去巡按真定諸郡其地
密邇京師號難治珪巡歷所至挈貪吏剗弊政無敢
干以私者卒年三十三

出府志

弟璋第進士珊舉鄉貢

林正字克全成化二年進士授監察御史勤敏有風力嘗巡視山東直抵儀真河道首鑄濟湮令兩涯植柳以固堤岸以庇行人往來舟楫便之沿河舊設淺鋪夫出椿芻而以者民掌之率受賕欺蔽正令民視芻價減半折納弊遂革又措置造橋一十二所巡按蘇松常鎮四郡繩違雪枉持法甚嚴丹陽蔡知縣者善交結權要正按其不法事權貴交口為之救解竟奪其職巡按廣東首詢民瘼輒形於詩曰鳳鸞自古為鷹隼郡邑于今尚爾絲豪黠之吏方聞風斂迹忽遘疾卒於行臺年四十一珪與正皆有志操時稱名

御史而相繼天卒士論惜之

出府志

又同時御史林誠

嘗因星變上言內閣大學士商輅當康定易儲時不

能執節宜策免

憲廟謂商輅時有諍言外人不及

知誠復疏論之下詔獄撻于朝而釋之誠旣忤當道

遂引疾歸養母居家凡十餘年成化末起復職性聰

警精於吏事以疾告致仕祖英兵部員外郎父輝求

樂二年進士誠天順八年進士子近龍正德三年進

士授南京監察御史陞廣西按察司僉事

出府志

黃嚴朱方林傳第六十六

林元甫吳繹思楊瓚傳第六十七

林元甫字秉仁蘊之後成化乙未進士選爲工科給事中詔充冊封占城使以建言罷遣後代使者俱得重禍又一日內出言官數人姓名付吏部外叙元甫以內艱獨免人以其爲大授器矣服除改注南科又以外艱去補禮科尋陞都給事中嘗請建國本斥遠物及省費恤患之類皆切於時政遷山東布政司左叅政值歲儉議者欲稅額石加五升以備賑濟元甫謂加賦害民不如勿賑宗藩妃葬欲大拓塋域元甫以非制且奪民田堅特不可以是東人咸德之

遷雲南右布政使尋轉左陝西虜酋火篩寇邊餽餉
繁重元甫隨宜調度軍以無乏民不爲病陞都察院
右副都御史巡撫四川蜀寇作設策平之有銀幣之
賜松潘不靖劫殺防禦官元甫督捕過當而渠驍未
獲言者以爲緩賊乃與貴州巡撫兩易之未幾移撫
雲南將召入以未疾乞休大宰鈞陽馬公重其爲人
奏留之疏三上乃許俟疾愈起用竟卒元甫堂類美
髯脩偉玉立表出班行而儀度閒整存心厚而容物
弘居官不苛細立名有大臣之度焉弟哲甫相廬教
諭子有恒蔭授都察院都事有孚監察御史姪有祿

瑞州有年衢州俱知府一門衣冠最盛云

吳繹思初名敷以字行更字恂周祭之後第天順元年進士授饒之德興知縣凡賦稅差科聽訟一處之公政暇輒戾學集諸生親課督之士風爲之一變遷瑞州府同知德興民爲立德政去思二碑陞惠州知府屬邑有巨壑枯勢虐民繹思繩以法守禦軍政爲上官所更張卒伍忿其不便將爲變繹思往諭以禍福皆羅拜下內艱起復適饒缺守旣人乞繹思守旣不久乃補潮州海寇竊發繹思躬率吏民激以忠義遂殲其渠魁捷聞有寶鈔羊酒之勞滿考陞浙江

叅政尋轉右布政使繹思丰神秀敏處心樂易於宗
族親舊情義最篤早以經學名及門多所造就若戶
部尚書周公經工部侍郎張公憲都御史汪公奎位
遇通顯猶終身不忘其教云繹思同年進士楊璿字
宗器初授吏部考功主事時家宰王公翱性剛烈爲
僚多曲意取容璿獨持正初不甚見知終遇以殊禮
進本司員外郎即中乃作歲寒亭以寓晚節嘗語人
曰楊震以卻金名世吾竊憾焉夫舉茂才而得懷金
之人其智或有未盡也卻金而存四知之畏其廉或
有未誠也遷湖廣叅政改河南以不能徇時璿歷

居要地田不增畝
廬風雨則略葺之亦可謂貴而

能貧者矣

出府志

林元甫吳繹思楊贊傳第六十七

鄭照顧元陳燮陳遷傳第六十八

鄭照字孔昭僊遊縣人性梗介不苟阿隨正統間由太學生授安遠令未幾以憂還起復改德安爲政以節用愛人爲主一錢不妄費一民不輕用有大事必屬耆老商確可否議定然後行故終照之任邑無失政無寃民焉持身皎如玉雪時都御史韓雍巡撫江西沙汰屬僚十去八九獨稱照爲廉官第二年五十三致仕歸郡人柯內翰潛遺之詩有云閑因技笏早貧爲守官廉一瓢顏子樂三韭果之賢人以爲實錄云

鄉大夫士私謚之曰清介先生

出僊錄新志

顧元字體仁正統間貢入太學授長沙府通判有能聲巡撫都御史劉廣衡奏旌異之時長沙府知府缺員藩臬奏補元不報滿九載陞高州府同知特高州賊環其疆周兵無虛日藩鎮檄元管運糧秣于外城守失陷家穢焉元還遂無意世事請老而歸到家行

李蕭然

出僊谿新志

陳燮字廷輔本莆田人至父顯始卜居僊遊羅峰山之下景泰元年領鄉薦卒業太學會兩京御史多缺員有詔嚴考胥監而後其尤者與進士相兼補之燮名在優等遂拜南京監察御史嘗巡視在京及鳳

陽倉儲別表刻弊豪強不得逞乃託鄉人謝瑚等行
百金求寬縱瑚等給其人而遂沒其金燮發其奸狀
置瑚等於法由是燮之清操益白江以南有勅盜當
路燮捕之燮畫策勦獲無遺史部上其最遷廣東
僉事憲度益謹廣東地瀕海番舶互市諸司皆有錢
燮獨不受未三載卒於官燮質貌魁偉資性穎異自
其少時治舉子業已有聲稱及入太學執經從遊者
甚衆若冢宰倪公岳其尤著者所四書經義習舉業者
爭傳錄以爲式

出府志

陳遷字漢崇號倦飛少以經學鳴天順甲申進士歷

南京戶部主事郎中江西布政司右叅議以外艱歸
遂不復出遷有意慕古善持論閒居幾三十年未嘗
輕跡城府嘗著仙谿新志

述

鄭照顧元陳燮陳遷傳第六十八

周瑛黃仲昭宋端儀傳第六十九

周瑛字梁石號翠渠以鎮海衛學生應景泰癸酉鄉試主司聶大年得其文大奇之寘詩經第二屢上春官不第乃益汎濫群籍務鈞深探賾與南海陳公甫遼左賀克恭上下其議論且相期以退隱爲高第成化己丑進士知廣德州倣古爲治興文教絕淫祠表死事之忠而嚴不舉女之禁教民有錄祠山有辨廣德人爲立生祠祀之滿九載陞南京禮部儀制郎中又三載陞撫州知府興水利著政本第輸納著政均力行保伍之法權右或以爲不便調知鎮遠因俗爲

政不鄙夷其民以書滿歸省毋 孝廟初三原王端
毅公爲吏部即家起爲四川叅政尋轉右布政使丁
毋憂服闋乞致仕給事中楊廉吳世忠交章以學行
薦吏部覆奏起用瑛堅以引年請迺進階資善大夫
致仕瑛丰神雅古其學不專於該博而於天文地志造
化物理皆嘗究心體索爲文章渾深雅健有根底詩格
調高古字畫初學晦翁變爲竒勁應酬至老無倦意所
著有經世管籥律呂管籥字學纂要詞學筌蹄地理著
龜晚年尤注意周易參同契作本義屢加刪定詩文有
翠渠類稿若干卷所修有廣德志蜀志漳州府志又與

黃未軒同修興化府志議論間有不合自謂蒲陽物
史云卒年八十九先是壺山石隨意必有名士當之
既而瑛卒平生急義祿入以給內外期功之孤貧葬
其不能葬者十數喪不計其家有無沒未幾家益落
子大謨博學能文以詩經魁禮闈告歸終養亦繼卒

補遺

黃仲昭名潛以字行號未軒祖壽生見前傳仲昭成
化二年進士選庶吉士授編修甫三月被命翰林官
各賦元宵烟火詩且出舊製令擬述以進仲昭以其
詞多鄙俚近俳優非儒臣所宜為與同官章懋檢討

莊杲共疏論之調補外仲昭得湘潭知縣時有翰林
三君子之謠言官交疏請復其官乃改南京大理寺
評事不例收隸卒顧直有富室弟訴其兄匿先世遺
貲者計所匿多違禁物法當沒官富人廣行賂求免
仲昭持不可卒沒之有盜劫一婦共汙且鬻之法司
以盜未得財止坐首惡一人仲昭謂盜汙良人當死
且鬻而得直非財而何卒從其議陞署寺副連丁內
外艱遂引疾家居會廣東提學員缺太學生簡進等
乞起仲昭補之不報弘治初元御史姜洪等言仲昭
學問淵源恬退可嘉令所司以禮敦促三年赴京陞

江西提學僉事奉教人以行實爲先值額例行簡

汰太嚴物論譁然仲昭亦自

以時不合再疏乞致仕

仲昭前後所居官不滿三考家居之日最久儒雅醞

藉爲鄉邦儀表平生刻苦爲學於書無所不讀精於

校閱嘗修八閩通志延平邵武府志南平縣志又與周

翠渠共修興化府志文詞雅正有未軒集若干卷孫

希英與從孫如金同第進士今爲都勾知府希韶希

濩俱舉鄉薦希濩今爲保昌知縣

補遺

宋端儀字孔時號立齋祖勸以太學生授沐陽訓導

溫厚沉默訓教諸生條約不煩而真意勤懇以毋老

解官歸養父汝勤舉鄉貢授安州學正學政久弛汝
勤一變之人才遂盛嘗考江西鄉試時莆令江西人
也重賂求私其子汝勤峻却之父喪解官服闋改濮
州終國子監助教出彭志端儀自幼莊重簡默不與群兒
伍年十三四雅志慕古舉業之暇輒取鄉郡先輩考
論其世其於賢否邪正悉錄之以爲法戒時郡守潘
侯琴以郡學所祀鄉賢或濫因發策詢諸生端儀所
對品藻詳明大爲潘所嘆賞成化戊子小試偶不利
衆咸爲稱屈其祖舅學士林先生文欽爲書白之當
道端儀曰出處素定奔走乞哀吾耻之識者已知其

爲遠大器矣歲甲午鄉試第七人辛丑舉進士廷試
第六人拜禮部精膳司主事丁內外艱服闋改本部
祠祭司遷主客司員外郎端儀三任禮部持身清慎
且諳練國典甚爲部堂諸公所器重公暇惟以校讎
著述爲事其家人生產略不加意官主客二年四夷
朝獻之使多奉贄以見一芥無取其或有所求請則
歷舉故典以開諭之其人亦徃徃心服以去弘治丙
辰陞廣東按察司提學僉事至則躬歷列部較其行
藝課其勤怠雖瘴鄉海島無所不至其教人務欲以
身表率而痛抑其浮誕竒險之習考較黜陟一以至

公處之在廣五年未嘗立赫赫之威而列郡之士翕然知所嚮方年甫五十六卒於官今祀於學端儼若家孝友動循禮法內外無間言性淳靜無他嗜好惟一意耽學稽經訂史汎濫濟蓄而於程朱微言緒論無不究極肯歸平生不作韻語間有議論皆根據義理闡世教不規規藻麗之工而已所著有考亭淵源錄莆陽人物備志鄉賢考證莆陽遺事莆陽舊事偶錄立齋問錄祠部典故高科考備遺錄藏於家

志子元翰弘治乙卯鄉試第一授潮陽知縣

周瑛黃仲昭宋端儀傳第六十九

鄭黃陳吳傳第七十

鄭瑗字仲璧前隸人露之後父儀和歷兵川六合二縣訓導瑗少穎悟過人書過目輒成誦年十三四援筆作古文詞識者交薦於部使者遣入郡學一時名士多出其下成化十三年領鄉薦第三人十七年會試廷試俱第七人未幾丁外艱歸足不踰戶限雖親舊罕接其面服除赴銓曹當道聞其名欲處以禁近瑗以羸弱畏寒自請南都一官乃拜南京禮部儀制司主事滿三載陞署本部郎中以疾卒于官年僅四十有一瑗天賦淳靜於物無所好惟一意嗜學自六

經諸史下至百家之書無不涉獵或談道古今故實
鑿鑿如身履而目擊者爲文詞渾雄深粹略無贅語
亦穩潤有唐人風致在稠人中恂恂若無能者一
名公鉅人咸敬重之及其歿也惜其學未盡用而
不滿德云出府志子登高正德辛巳進士今爲戶部

二十一

淵字源續號壺陰少治經業工力倍人於諸經子
入無不獵涉論筆尤長與鄭瑗爲文字友齊名膠庠
提學僉事周孟中於人少許可得淵文亟爲延譽中
成化庚子鄉試卒業太學爲祭酒立文莊公所器名

益重從之遊者常數十百人傳錄其口授語彙而成
帙名爲資講傳布四方於後進多所成就第弘治癸
丑進士選庶吉士授翰林編修以母老告歸十餘年
毋終復起供職轉國子司業遷南京翰林侍講學士
以疾乞致仕卒濶學問淵未儀度閑雅平生寡慾無
媵妾於仕進亦不數數然子肯堂中鄉試第八人有

敏名早卒

補遺

陳仁字子居號三渠少從其從父兄翰林庶吉士邦
瑞治書經多所通解任抗學彥常按莆試士摘史命
題時莆人專治經通史者尚少仁援據精博議論層

出任公得之大驚成化癸卯發解第一丁未第二甲
進士授戶部主事歷江西司郎中在部久明習條格
部堂有大事輒與咨議洪洞韓公文允倚任之屬陝
西邊餉緊急因奏訓仁爲陝西司郎中未幾逆璫劉
瑾擅政深忌韓公因摘其屬官細過仁坐降鈞州同
知轉汝州知州遷南京兵部員外郎掌武學事璫誅
擢浙江提學副使浙僭喜生謗仁按試不以吏胥從
手自披閱去取惟公士論大服轉本省叅政以疾乞
休吏部奏言本官久歷中外學行有聞例應加秩詔
進本司右布政使准致仕命未下而仁卒矣仁質重

沉敏議論向正嘗疏止給事中林廷玉外謫追復御史彭程官闕里及禮部災條陳時弊言多剴切政暇輒討習文事晚年造詣益深文章奧美有機軸時譽歸之陳氏自邦瑞舉進士以經學擅名弟邦器亦舉進士官至雲南副使仁之子懋舉鄉薦

補遺

吳仲珠字純夫後吳人少精舉業中鄉試第三人再上春官期必得魁元竟以第三甲進士出宰義烏仲珠涉世甚疎居官惜於吏事以公錢助喪為御史所按乃嘆曰士何往不自得即家居授徒亦足自給遂歸每歲從游常數十人遠方亦往往有來學者經

與語衆不能講解者仲珠體貼分析明白發之為文
語新意到嘗自謂詩不如古文古文不如經義所著
有詩經四書講說刊布士之攻舉業者資焉以故海
內多知其名云子文忠舉鄉薦今為温州通判

補遺

鄭黃陳吳傳第七十

方郭伍黃吳朱傳第七十一

方樸字時舉初名槐生次彭之後少資稟過人長通詩書春秋元至正末行省以隱逸薦不起授北溪書院山長泉州路教授俱不赴方與其友郭維貞宋貫誠輩作壺山文會以進修爲事而文名益著洪武初舉興化府學訓導推所學以淑髦士不以位卑爲意謹慤有禮平居未嘗去衣冠與人交薰然和聞人善揚之不置先賢蔡忠惠林文節劉文定墓久圯壞皆陳於上官葺完之郡丞李景齊素敬禮時舉民有怨丞者誣訟于憲司詞連時舉既遣歸矣御史疑其獄

有賍復逮之時舉不能再辱乃辭孔廟先祠夜沉于井年四十八嘗修蒲陽人物志未卒稿人咸惜之

出岳

志等書

詩文清峻有法度文會諸人皆推下之

郭完字維貞自號滄洲宋武翼郎彥華之後也完言信行謹學術純正工五七言古近體詩以雜於許渾薛能集中未易辨也當元至正之季隱約於壺山泉石間與方時舉輩二十二人結壺山文會以氣節相高詩酒自娛家甚貧無子惟以教授生徒爲業疾且革會友方用晦王孟寬釋清源輩許爲營葬完乃自爲廣志陳誠中哭之以詩曰有妻正斜被無子紹殘編

東野詩名在樊川誌稿傳吳源爲跋於壙志之後所
著詩文惟間出於壺山文會集中蓋無全稿云出人
物備

伍衡字時敏學博氣淳工古文詞尤工古近體詩其
文平實穩順時出新意詩七言歌行麗縟奇崛頗有
溫庭筠李長吉之風律詩充贍華美不爲雕鏤語要
其歸蓋已自成家非近世規模倣剽竊以爲奇者
比也元末兵亂恣同知柳伯順入國朝始以薦起爲
增城知縣其出處亦未聞有玷缺云所著詩文多散

逸無全稿出府
志

黃約仲澠頭人永樂間以楷書選赴行在預修五經
性理等書詞臣有薦其能詩者試中優等授翰林典
籍陞檢討卒子謙舉鄉薦出彭志約仲之詩語意清婉
音調和適得唐人門徑至今人傳誦之有集藏於家
國初徵前代繁縟之敝文尚簡易其流遂至淺俗讀
之無味時有余師孔者下余人由儒士舉為本府訓
導善於教迪工文詞一時撰述出其手又有鄭彥斌
東廂人由明經舉為閩縣教諭學精於易詞賦亦豐

蔚可觀神道

吳稔字時耕水南人叔告之後性穎悟嘗賦廬山瀑

布詩有入雲聲作雨映地色涵秋之句初從黃檢討
行中學詩經復從盧縣尹質中學書經講習之下皆
能逆意而解嘗試鄉闈不利遂不復應舉後進迎以
爲師舉業詩課立爲改定諸生以其學取科第者甚
衆中年以知者兩薦爲訓導以母老辭不就同里有
朱煜者字體光龍巖縣令健之曾孫也煜始育而嚴
嘏及長自分不堪世用乃閉戶讀書以脩身善行爲
事年十七輒爲鄉人師經其指授爲顯官者其若太
子少保翁世資侍講學士吳希賢布政使周瑛叅議
朱文環按察副使丘山僉事楊琅皆出其門里嘗有

疑獄太守潘本愚以書請曰先生盛德厭人心願得
一言而決煜陳說無隱情潘深然之繼又以事請竟
以疾辭後以子愷貴累贈南京戶部郎中愷與弟悌
同領成化戊子鄉薦愷乙未進士卒官馬湖知府爲
人樂易誠篤雅有父風蒞官所至有勞績悌戊戌進
士拜行人遷南京監察御史陞浙江按察僉事其爲
御史時有真武土木銅鼓畫工諸命悌率同官疏乞
罷之京尹同僚不協而闕疏論去之選曹簞簞不飾
者復疏論出之士論稱快云出府志往時水南鄉塾有
詩課士大夫結爲詩社延縣丞魏時敏虞士張元紳

白首不廢吟咏時有佳句今此風頓廢

遺

方郭伍黃吳朱傳第七十一

林長清林淮傳第七十二

林長清，宋紹興進士。瀛八世孫。正統乙丑進士。歷行人戶部員外郎。天性廉儉。未六十致仕。母鄭氏八十餘歲，嬰疾，輟轉床褥者數年。長清設榻於其側，嘗視湯藥，不離左右。一夕數起，皆親扶持之。爲操溺器，家不甚裕，遇有美味，具以養母。奉身糲食而已。每歲母生日，輒夙興代母梳洗，背負出中堂，與家衆上壽。行禮，母閱其筮，謂之曰：「我旣不良于行，何須如此？」對曰：「使長清歲得以為常，豈非大願邪？」及母歿，哀毀骨立。士大夫見其老而篤孝，咸嘆仰以為不可及云。

出彭志

林淮字長深蘊之裔成化十一年進士拜刑部主事
卽奉母入養京師旦就郎署必戒婦飲食盡恭久之
母念家鄉切遂引疾歸日相與周旋桑梓旣三載官
府趣淮供職淮以京師苦寒非母高年所宜居廼疏
乞改南京刑部遷員外郎弘治初元陞雲南僉事淮
曰吾所以棄北就南爲養母也今雲南去京師萬里
吾母豈宜往乃陳情願爲近地學職以養母朝議謂
此風教所係宜從淮請乃奏淮爲常州府教授親終
復注僉事如初以慰淮之子母以勵臣子忠孝制曰
可居二年母以病卒淮哀毀扶襯到家亦卒淮初入

刑部未平有疑獄一家十八人坐死前官持兩端不
決淮一訊立辯人服其明允嘗當盛夏提獄令人汎
掃臭穢及剪剃老囚髮日煮艾湯與浴彌月囚無瘦
死者淮有女弟適人母愛之每迎養必挾與俱大槩
淮操行於倫理為最重云

出府志

林長清林淮傳第七十二

李必陳睿傑劉閔傳第七十三

李必字叔英城北人幼謹愿好學長而多聞元季隱居不仕與友人方時舉等為壺山文會平居恂恂言若不出口及與商確古今沛乎不窮其父早卒事母盡孝母卒哀毀盡禮獨居三年紈綺不至身酒肉不入口司業吳源嘗作述孝以美之洪武初舉僊遊訓

導卒無子

出彭志

陳睿傑早失怙事母盡孝母嘗病睿傑稽顙天封股肉和粥以進病隨瘥母老患目疾雙淚淋漓醫弗效睿傑每旦以舌舐之終母之身不怠母年既老睿

襟左右扶持不少離所御衣被或污穢必躬滌之至
於溺器亦然母沒號慟幾絕水漿不入口者三日既
而歡粥蔬素以終其喪忌晨及生日極其悲痛終日
不食蓋其年雖老而哀慕之情不衰一時鄉大夫士

咸稱其孝云

出府志

劉閔字子賢幼有至性少長知學即絕意科舉求古
聖賢提身訓家之法率而行之動循古禮造次不苟
家甚貧極力養母定省溫清疾不解帶母或恚怒則
衣冠跪床下竟夕不敢起以父早亡與祖母二喪不
克葬遂斷酒肉遠房室訓徒隣邑朝望歸則號哭於

殯所如是者三年隣族憐之為助其塋毋毀哀毀骨
立廬護墓側衰經疏食終其喪祭祀必齋沐率男婦
奠獻一如文公家禮閨門嚴肅妻失愛於母出之終
身不復娶林見素起留臺疏于朝曰劉閔學行高古
雖詞藻不逮而德宇道風人自難及宜徵侍青宮講
讀不報御史宗彝知府陳效又薦之詔授本縣儒學
訓導職銜前後按部大吏及守令率與鈞禮特致餽
以調其之于嘗謂閔之約身苦行敦尚倫紀雖蒙
之矜嚴好禮江革之貧窮養母元魯山之不近女色
殆不能過云所著有家禮考註昭穆圖宗子說五倫

啓蒙孝經刊誤等書藏于家

補遺

李必陳睿傑劉閔傳第七十三

陳茂烈黃鞏傳第七十四

陳茂烈字時周號如賓先世浙之瑞安人曾大父伯洪以軍功注與化衛總旗遂居郡城之梅峰茂烈髫年喪父繼戎役厲志邁俗不與群兒伍晝入公署夜歸讀書祖母憐其孱弱亟止之乃韜燈默誦不少輟年十八慨然嘆曰善學聖人者莫如顏曾顏之克己曾之日省豈非學之法歟迺作省克錄以自考登弘治丙辰進士奉使廣東所司以故事致贖迺謝曰吾窮時嘗授徒兩臬司尚不歌規利干人況今日邪於是往拜白沙陳公甫願執弟子禮白沙與之語累日

其直且告以為學須主靜一退而作靜思錄終身佩服其教切授吉安府推官吉俗健訟一詞所逮多至百十人迺下令曰告者不出則詞不行逮者事有干則至無則免及訊鞫親召至膝前以理辯折不妄施敲朴民亦往往輸情服罪以去吏部考其治行為理官第一召入為御史恪慎共職冠服淡素借人一牝馬乘之時大臣有縱子受賂者言官交劾不退茂烈申糾其罪勒致仕崔志端起道士為尚書再疏論之不報乃以母老乞歸終養所居無廳事增構尋丈田歲入甚薄養母甘旨外與家衆共蔬食畜一蒼頭採

薪給爨出則挾一傘自隨臥榻不備布帷其清苦無
與為比而處之裕如也克養沉粹與人不知崖異見
之者自然愧慕交際取與一毫不苟官府事閑耳不
聞終日危坐一室以讀書窮理為事嘗語人曰儒者
有向上工夫詩文土苴耳吏部以茂烈養母清苦奏
改為晉江縣學教諭資其祿疏辭不拜既又援侍郎
潘禮事例奏給月米制曰陳茂烈清苦可嘉著有司
月給米三石以資孝養又具疏辭制又曰朝廷以孝
治天下陳茂烈既家貧親老特給月米以資養贍不
准辭茂烈以母年九十未有嗣息日夜以為憂方抱

疾而母卒強起號哭寢地疾轉亟泣謂岳曰吾平生所事見素所友吾弟如不可諱惟身後是託見素為治殮具立其族子遠揚為後海內大夫士聞而傷之御史王應鵬以府衛所列事狀上聞詔賜坊牌用表宅里扁之曰孝廉祀於鄉賢祠仍優恤其家

補遺

黃鞏字伯固號后峰後黃人唐刺史岸之裔弘治乙丑第進士初筮德安府推官法理有聲部使者交薦之以考績留為刑部主事清勤共職部堂咸遣子就學令掌一部奏牘尚書何公鑑轉兵部奏調鞏為其部主事倚任尤專正德甲戌進員外郎克會試同考

官得今吏部馬理等三十餘人皆知名士歷車駕職
方二司郎中以母喪歸服除時武宗北狩人心危
疑或厄其行鞏題其書室曰茅屋石田為生太拙鴟
夷馬革自許何愚蓋有志於殉國也至京補武選郎
中己卯春有旨南巡時寧藩蓄逆上下以為憂大臣
科道交疏不聽諸部寺司屬咸起而諍之鞏以其事
出於邊將江彬誘惑彬方席寵擅權生殺出其口無
敢及之者鞏獨疏六事曰崇聖學通言路正名號戒
遊幸去小人建儲貳言極痛切海內爭傳誦之詳載
奏議集中其去小人之條專指彬為亂首法所必誅

車駕員外郎陸震見其疏稿願同署名以進疏既入
自分必死為書別知友託以後事及收拾遺文彬果
大怒欲必寘之死乃下詔獄廷跪五日杖百餘除名
陸竟死鞏體極修羸幸得甦以詩遺弟曰不用汝謀
方至此須知我道固當然蓋萬死不悔也自是杜門
著述家素貧客至留款貸米隣村日中未舉火亦不
以屑意於官府無絲毫干 今上登極以南京大理
寺丞徵處法明恕廷中稱平屬議禮未定鞏進疏大
略謂陛下既承孝宗之嗣當明為人後之理既承天
下之重則當明二親之撫反覆千餘言皆關係綱常

靖元年秋南京九卿例須一人持表入賀聖旦鞞當
行忽病作稍愈強就道旣至京縉紳慕其名延接無
虐畧病復作竟不起自公卿而下無不傷悼其平生
知友若門生爭厚割俸金為賻南都士夫亦然覓素
與予既治其喪且合諸奠賻約三百金為歸買田立
嗣給事中劉世揚御史黃國用疏其忠節請加卹典
詔特贈大理寺少卿與祭一壇蓋異數也鞞嘗言曰
人生仕宦至公卿大都不過三四年惟立身行道
為千載不朽世之人往往以彼易此何邪其素志如
此沉敏好學雖疾病支離手不釋卷詩文清粹和婉

幾自成家莆一時人物輩與茂烈名行相次惜未究
其用又皆無子而鞏年尤夭雖然觀二人所樹立亦
可與天壤俱敝矣

浦

陳茂烈黃鞏傳第七十四

附鄭山齋公傳第七十五

鄭烏字汝華號山齋南湖先生露之後先世自桃源徙蒲坂高祖以貨雄於鄉被訟戍甘州因之破家一再傳益落父朴菴徙入城僦居金橋岳七歲而孤賴母林兄嵎食貧而撫教之岳踰弱冠登弘治癸丑進士授戶部主事考績馳恩遂移疾歸塋其父起補刑部主事錦衣千戶張福同監市囚福恃勢越坐岳奏論語涉中貴孝宗怒下詔獄堂官疏救以免轉負外郎時邊事孔棘侍郎許進督師大同貴近惡其剛方議代前副總兵趙景僨事坐廢謀復起京軍

屢出無功又議再遣岳抗疏論列人咸稱允擢湖廣
按察僉事宗藩侵民田奏勘不決岳竟歸之民施
州夷民忿爭讐殺衛帥以亂聞岳勒首事數人餘悉
諭遣他若辨盜鑄土官印信及追獲縛賣容民男婦
百餘人皆異政荆岳歲饑無備設法以賑全活甚衆
常德守刑貨瀆濫捕其信任者寘之法守解印綬去
南原十三道會薦天下方面官十七人岳與焉武
宗初擢廣西兵備副使征里松洞奏捷及撫諭土酋
岑猛連受褒賜築足灘廣運昭平三堡屹爲府江
巨鎮調廣東副使滯獄爲空治稱第一尋擢江西按

察使宸濠結逆瑾復護衛諸司承順勢益熾岳至力
振風紀爲濠所忌連擢本省左右布政使宸濠橫奪
民田億萬計民設寨聚守濠諷總制以兵勦岳沮止
李副使夢陽江御史萬寶和訐奏下藩臬會勘岳欲
平其理而夢陽務求勝致其怒濠從而嗾之乃執岳
察司舊役門隸誣用公堂銀鍛詞送濠禁錮事聞下
鎮巡勘報濠左右夾持成獄家人擒捕殆盡子泓未
寇亦被執人心憤惋不平科道暨撫臣交疏其枉於
是遣大理寺卿燕忠給事中黎奭覆勘濠收質事證
妻子脅無異詞衆環泣曰王府費萬金陷公公必欲

白我輩無噍類卽公亦禍巨測岳乃自誣服坐罷濠
反事敗內外臣工交章論薦起岳四川左布政使以
母喪未終制不赴嘉靖初制滿陞都察院右副都御
史巡撫江西至則民擁道聚觀手額相慶岳奏賑恤
受兵部縣定次討逆軍功及贈祀死事之臣皆報可
甫三閱月擢大理寺卿輔臣以擁立世宗功議封
伯岳遺書內閣所厚蔣冕勸其辭避林見素後以司
寇召至協襄守法一無所假勘害陝西正總兵官李
隆與都御史許銘不協而嫁其禍也道見北
人不知水利乃相度還奏爲定田之計前後凡四上

疏皆切時政陞兵部右侍郎兼左侍郎大同兵變救而復叛岳主議管軍官不報首惡姓名誅之事可立定乃密令總兵桂勇斬首惡數人主兵者奪其功與奏帶大璫弟姪御史王官輒爲覈實岳器部事駁行改正內侍崔文方用事其姪指揮崔昂欲躡陞裨將岳又執不用權倖由茲側目岳嘗議大禮忤旨奪俸及是群小媒孽眷寢衰會寧夏總兵神勛行賄求調爲東廠捕追金幣勛嘗矢事被岳劾禮帖獨無岳名言官風聞論之岳上疏自白因力乞休致世宗聽之歸歸凡十五年薦起者六竟格弗大用云

岳事寡母甚孝念兄鞠哀恩罄官俸以報遂罷官兄
割償產之半葺蒲坂祖祠益祭田又與族子公奇等
別創南山始祖祠暨脩治先世諸墓至於開渠造橋
遷社育利於鄉族者無不惜費倡逸老會以登臨酬
唱爲娛好禮勸書老猶不懈爲詩以揚遠醜藉所著
山齋淨稿吟稿奏議駁稿蒲陽文獻蒲陽志略尤喜
獎掖後進士夫家食者勸其著書爲不朽事業聞者
有所激厲享年七十二卒泓字士流初爲寧遠所陷
克戍赦回蔭授詹事府錄事終養親終不出享年
七十三卒逸老會做古真率... 罰飲大斗預者七

人皆鄉國之望林都憲茂達年七十五林處士嘉績
吳副使希由俱年六十七林御史季瓊宋知縣元幹
俱年六十五林副使有年年六十四鄭司馬年六十
三七老繪爲圖司馬爲記謂老成典刑風教之助豈
但讌遊爲耶最後預者二人林侍郎富李寺丞廷梧
諸老多享壽云

邑人南京戶部主事柯維騏撰

鄭岳傳第七十五